

2. D. B. V.  
DISSERTATIO MEDICA

De,

URINIS,  
EARUMQUE SIGNI-  
FICATIONIBUS,

Quam,

Consensu & Autoritate Gratosissimæ

Facultatis Medicæ in Inclytâ Salanâ,

P R Æ S I D E

*VIRO Nobilissimo atque Excellentissimo*

DN. GEORGIO WOLFF.

GANGO WEDELIO,

Med. Doctore, Theoretices Professore,

Publico, Medico Ducali Saxonico, & S. R. I.

Acad. Natur. Curios. Adjuncto,

*Dn. Præceptore, Patrono, Promotore suorum studiorum*

*ad urnam colendo, devenerando,*

Publico Eruditorum examini submittit

JOHANNES DANIEL Schrader /

Hardefiensis Saxo.

*In Auditorio Medico.*

Ad d. Septembris, ANNI M. DC. LXXVIII.

---

JENÆ,

TYPIS SAMUELIS KREBSII.



V I R I S  
*Maximè Reverendis, Excellentissimo,*  
*Amplissimis & Clarissimis*  
DN. M. JOHANNI JACOBO

*Specht/*  
Serenissimi Ducis Brunsvic. & Lüne-  
burg. per Ducatum Göttingensem Superinten-  
denti Generali dignissimo;

DN. GEORGIO *Schrader/*  
Ecclesiæ Hardefianæ Pastori primario,  
Vicinarumque Superintendenti meritissimo;

UT ET

*Nobilissimo atque Spectatissimo*  
DN. JOHANNI *Runkel/*  
Præfecto Hardefiano gravissimo,


*Dominis, Mæcenati maximoperè suspici-*  
*endo, Parenti æternùm venerando & Affini*  
*longè dilectissimo,*

Salutem & felicitatem perennem!





*VIRI Maxime Reverendi, Ex-*  
*cellentissime, Amplissimi,*

Uamvis nullum tempus de-  
votionis meæ argumentis  
non opportunum esse debeat,  
tamen placuit illud arripere,  
quò literario cum primis munusculo ve-  
nerari Vos mihi licuit. *Te* quidem, *Sum-*  
*me Patrone*, cujus, dudum est, quòd  
propensissima in literas earumque cul-  
tores voluntas eò me bonosque omnes  
adduxit, ut nullam gratiores Tibi ob-  
lationem credamus, quam quæ à Musis  
petitur. *Te* verò, *Venerande Pater*,  
cui tantum abest, ut suffecerit vitam,  
dedisse, ut hoc ipsò naturæ ac patriæ in-  
juriã fecisse ipse Tibi videreris, nisi ean-  
dem.



dem melioribus studiis applicatam aliquem illis animadvertas fructum ferre. Te denique, *Optime Affinis*, cui quâ aliò testimonio animum necessitudinis nostræ semper memorem publicè aperirem, equidem non reperi. Nullus dubito, singulos hoc mihi daturus, ut sufficere Vobis sentiam, affectum observantiæ plenum declarasse, & vel chartam in donarii alicujus vicem apposuisse. Cui tantæ confidentiæ si approbatio vestra accesserit, abundantem devotionis meæ fructum tuli. Valete. Dabam. in Atheneo Salano IV. Kal. Octobris ANNI O. R. M. DC. LXXVIII.

*V. V. Maximè Reverend.*

*Dignit. & Amplitud.*

observantissimus

Johann Daniel Schrader.



5.  
CAPUT I.

*De urinæ notione & elementis  
in genere.*

**M**agni per quamplurima secula æstimata est urinæ in morbis inspectio, cum ex sanguine procedat, cujus vitium eandem esse arguit *Billichius*, uti acetum vini. Urina, juxta *Celsum*, auguria habet valetudinis, seu juxta *Plinium* non sine causa valetudinis auguria ex urinis trahi possunt, cum humorum in corpore sint quædam defecta portio, adeoque pars testimonium ferat de toto.

Præsupponimus ergò 1. non minimum esse interpretem sanitatis & valetudinis urinam, adeoque inter signa locum habere præcipuum.

2. Ut benè omnia perpendamus, præsupponendus in antecessum etiam est, (quod de aliis signis omnibus valet) *Aphorismus Hippocratis 66. s. 7. quæ per vesicam, inquentis, excernuntur, spectare oportet, an talia sint, qualia sanis subeunt.* Nam quæ his minimè sunt similia, ea morbosiora, quæ verò valentibus similia, minimè morbosa. Hinc benè nosse expedit, quid sit urina, & qualis sanorum se offerat, ut contraria, juxta se posita, magis elucescant.

DEFINIRI potest liquor excrementitius, aquosus, particulis potissimum salinis, & tartareis, magis vel minus saturatus, renum operâ secretus.

Duo totâ definitione tractantur, urinæ liquor & contenta, quas partes in serosam & salinam dispecimus.

*Liquor* est à posteriori excrementitius, cujus materia seu elementum est duplex, alterum proximius, alterum remotius, illud serum officio suo functum, refluxum, hoc humor superfluous ex cibis & potibus in ventriculum ingestis.

Ingeritur potus, ut coctio fiat, & succus ad cor venire possit, aptus reficiendo & nutriendo corpori, ideoque tum ipse huic rei aptus est ex parte, tum vehiculum est partium utilium, in substantiam sanguinis & partium cedentium.



Neque verò solus potus simpliciter dictus concurrit, sed partes liquidæ alimentorū quorumvis omnes, siccissimi enim cibi continent quoque in se humiditatem quandam, quod per ἐγγχείησιν chemicam notum est, præcipuum tamen confert potus. Neque enim totus ita comparatus est, ut, factâ alteratione, omnis subeat substantiam partium; hinc superfluum secernitur, tum sui gratiâ, videmus enim restagnante urinâ tumores aquosos abdominis, pedum & alia symptomata oriri, tum aliorum, quæ purpuram sanguinis deturpare, particulas ejus balsamicas invertere, & consistentiam laudabilem destruere apta nata sunt, quæ imbibit & unâ evehit.

Præter materiam potulentam & illam quidem magis aquosam, tenuem & excrementitiam, quæ quotidie ceu principium extrinsecum urinæ materiam foeneratur, alia etiam interna concurrit, non quidem planè heterogenea, quoad substantiam & ortum primum, unde etiam sub serosâ uno nomine eam complexi sumus, alia tamen paulò, quoad qualitates & ortum secundum.

Constat, ex alibi dictis, serum esse alimentarium humorem ministrum, principali, qui sanguis est, inservientem. Hujus mensuram & proportionem natura certis definit limitibus, nec deficere scilicet debet, nec exsuperare, nec peccare qualitatibus peregrinis. Ut ut verò diffletur idem per sudores & eventetur, alibi faceffat in lacrymas, aliaque similia excretionis dentur loca; Cum tamen exire & secerni simul debeant scorix impuræ salinæ & tartareæ, natura amandat per vias hæc urinarias id ipsum, ut extra sphaeram suam abeat, & uti prius fuit ὄχημα τῆς τροφῆς, *vehiculum alimentum*, ita aliud secundarium munus ipsi committit, ut sit ὄχημα τῶν περιττωμάτων, *vehiculum excrementorum*. Excernitur scilicet tum quia abundat, tum quia subtilifanda & exaltanda erat massa sanguinea. Subtilifatur, dephlegmatione peractâ per secessum huncce, exaltatur, quia partes oleosæ, balsamicæ & volatiles necessariae sui juris perstant.

Hinc apparet, juxta *Helmontium*, urinam & laticem differre, seu non confundendum esse serum cum urinâ, magna enim hujus differentia est, quando cum sanguine conjunctum est, ab eo, quod jam separatum, id verò licet probatione non indigeat, patet tamen  
magis,



magis, si consideretur utriusque substantia. Serum per V. S. extractum si evaporetur calore ignis, fit mucosum, & instar albuminis ovorum crassescit: qui vero vidit evaporare urinam in destillatione ~us, maximè ab hoc diversum observare potuit.

Claret id ipsum etiam à qualitatibus sanguinis; serum in vas lymphaticis purum est, sapore dulce, aqueum & insipidum, adeoque blandum & mite; urina falsa.

Patet ergò 1. ipso sensu teste, primum elementum, ex quo constat urina, esse serosum, seu liquorem, partes serosas, liquidas. 2. verò itidem sensu manifestum est, non purè esse aqueum hunc liquorem, sed præter systasin hanc immixta esse alia quoque, & se exerere, tum explicitè, tum implicitè. Explicitè in eodem partes salinæ se exerunt v. gr. gustu, est enim notissimum, quàm ingrato sapore afficiat linguam, ut ferè in proverbium abierit sapor urinosus. Tactu constat, quàm doleant partes excoriatæ, si instilletur urina; odore se manifestat sal volatile.

Habet verò urina & partes acidas & volatiles salinas in se, confusas invicem, unde facile possunt separari; prostat enim in chimicis & spiritus acidus & urinosus; præpollent tamen salinæ volatiles.

Demonstrabiles sunt partes hæ salinæ, etiam ratione, 1. quod sale quotidie vescamur, 2. quod alimenta & potulenta, si non formaliter, tamen materialiter sale fixo & volatili abundant. De quo possunt legi, quæ ingeniosè differit *B. Mæbius in Epit. Instit. p. 316.* in hoc solum excusandus, quod salis volatilis præsentiam in potu & cibis vix admittat, & aliunde deducat, id quod tamen experientia hodiè detexit. Negavit item *Zwelfferus* sal volatile posse produci ex plantis, sed falsus est. 3. Quod urina varia quoque salium genera constituat simul, Borracem, ex descriptione quorundam, sal ammoriacum, nitrum & alia.

Implicitè verò insunt simul particulis his salinis 1. particulæ tartareæ terreæ, 2. particulæ etiam, licet pauciores, sulphuræ. Notum enim est per experientiam, quod salia & terreas & sulphureas in se abforbeant particulas, quod patet exemplo vitrioli, salium lixivorum, aliorumque. In apricum prodeunt implicitè immixta, tum per se, tum mechanicâ chemicâ per ignem. Hinc in matulâ



matulâ fecernuntur & affiguntur, sensim subsidentes & secessum facientes, limosæ tales scorix; hinc ab exaltato hoc modo & explicato sulphure color; uti post docebimus.

Hinc phlegma in urinæ destillatione prodit, prodit sal volatile & fixum. Paucum verò oleum seu sulphur immersum est urinæ, tum quod puriori sulphure ad calidum innatum opus erat, unde retinetur, tum quod impurius cum fecibus alvi fecernatur.

Hic obiter, de usu solliciti etiam in minimis, applicamus dicta  
1. ad jejunium magicum, quod aliàs etiam dicitur ars Dionysiana, quod Paulus Apostolus à Dionysio illam didicerit, & peragitur, quando totis 6. vel 9. diebus nihil comeditur, & bibitur, excepto paucissimo vino, quàm quod indies emingitur, unde venantur liquorem alcahest & confortans universale; ut mittamus alias circumstantias. Frustraneum verò id opus est, superstitiosum & perniciosum, quod renes maximè & totum corpus debilitat, de quo quidem hic plura dicendi locus non est.

2. Urinæ stimulus salinus mundificat & abstergit, unde scabiem & alia cutis vitia curat, & in clysteribus fortiter operatur.

3. A vulgo etiam prædicatur, si quis urinam propriam hauriat, ceu sanum & præservativum. Sed sordida, & ferè plus quam beluina hæc medicina est.

In statu naturali ita se habent elementa urinæ, in p. n. verò variis modis hæc observantur diversa, non solum quoad accidentia varia, de quibus infra, sed & quoad ipsa essentialia jam dicta, serosa & salina, quando ipse sanguis plus debito funditur, ichorescit, salibus copiosis sylvestribus abundat, quæ in urinam deponit, exemplo diabetæ, scorbuti, hydropis &c.

Quoad efficientem causam, urina non est privatum excrementum renum solorum, quod Lycus apud Galenum voluit, neque ab hujus vel illius visceris fonte, ceu parte mandante, resultat, sed publica est sentina & totius M.S. excrementum, à toto corpore adæquatè, proximius in viscerum coquentium culinis generatum & elaboratum, proximè verò à renibus, peculiariter ad id conformatis, ut poros ipsorū tantum aquosior & salina superflua portio transeat, excludatur verò Area seu sanguis naturaliter, secretum.

Nec solum passivè se habent renes, ut instar cribri concedant.



9.  
dant saltim transitum, sed ipsi transcolant dispositam antea materiam in coctionibus prægressis, cum rudimentum scilicet accepit in ventriculo, hinc in aliis quoque visceribus, quolibet officium suum faciente ad hoc aptato. Hinc separatur ibi pars aquosior & falsior sanguinis, tum quæ recens à potulentis accessit, quæ sine sale ferè est, & insipida, tum quæ à depuratione & coctione relicta & illuc amandata fuit. Suscipit ergo sanguis ac serum etiam hic alterationem quandam, à fermento renum, neque prius liquor ille urinæ nomine venit, quam à renibus fuit secretus.

## CAPUT II.

De

### *Causis coloris urinæ naturalis.*

**D**E colore urinæ, qui in sanis mediæ ætatis est citrinus, aureusque, unde exoriatur, maxima lis inter Autores extat.

Hæc ut in synopsi exhibeamus & determinemus, dicimus, colorem urinæ vel ab intrinsecis principiis constitutivis dependere, seu ipsam constituentibus & ingredientibus serosis & falsis, & his commixtis particulis: vel ab extrinsecis, calore &c. Deinde præsupponere liceat ex principiis chemicis, colorem radicaliter adscribendum esse sulphuri, explicativè verò salibus, adeoque sulphur explicatione & expansione egere, si colorare debeat.

Non potest color urinæ adscribi calori directè & proximè, ille enim generalis quidem est coctionum & actionum corporis humani præses, & concurrat utiq; ad coctionem & salium sulphurumque separationem; ipse verò color intrinsecum quid desiderat, licet enim aqua vel centies coquatur, non rubescit, nisi in se habeat quid intrinseci, quod explicari possit.

Neq; tribui potest per dicta hæc parti serosæ & aquosæ, neque salibus primariò; licet enim lixivium sint colorata, post elutriationem cinerum cum aquâ simplici, illud tamen fit non propter salia, sed propter partes sulphureas quas in se abriperunt, non factâ per perfectam calcinationem omnium sulphurearum particularum absorptione,

B

Nec



Nec partes terreæ aptæ natæ sunt, ut colorem aquosæ parti impertiant, solum ergò restitat sulphur, quod, ubi quærendum sit, alii aliter sentiunt.

Veteres, ut *Galenus*, à bile illud fieri rati sunt, cujus portio urinæ commixta colorem illi, & quidem aureum conciliet, quem secuti sunt plurimi alii, tum veteres omnes, tum recentiores non pauci, sicuti in specie defensionem hujus suscipit *Martinius in Anat. urinæ c. 1.*

*Helmontius* verò à stercore liquido & tingente intestinorum, quod recipit urina & ejusdem particeps fit, colorem deducit.

Rationes verò in contrarium, seu contra bilem adducuntur. 1. quod urina non amaricet, bilis verò sit amarissima, copiosum, etiam liquorem eodem sapore inficiens. 2. Quod urinæ sanorum non tingant linteamina, quod fit in ictero.

Verùm lusus tantum est in terminis, & benè hæc possunt conciliari. *Helmontii* enim scoria, & bilis non tam re differunt, quam nomine, bilis verò vel hoc ipsum stercus liquidum particulis sulphureis copiosè refertum est; & si abundet & restitet, eminenter urinam tingit in ictero, hinc absurdum non est, si statuatur, easdem particulas sulphureas quæ bilem constituunt, & seorsim separata à salibus absorbentur & explicantur, etiam constituere colorem urinæ.

Quod verò non amaricet urina, causa est, 1. quod paucum illud sit sulphureum; 2. quod amarities illa copioso sale obtusa & refracta est, liquore verò diluta; 3. quod, ut *Martinius* loquitur, non tam de fecibus & amariore illâ amurcâ, quæ in folliculum fellis coctione despumat, accipiendum est veterum assertum, quam de flore bilis & benigniore parte, uno verbo, à particulis sulphureis impurioribus color hic unicè dependet.

Quod verò ad tartarum pertinet, concedi facile potest, cum terreis se jungere posse intimius sulphureas impuras & tingere urinam, quam in rem allegamus residuum ab arcano tartari jam præparato, quod in filtro remanet tartareum insipidum, & ob crassum & per  $\frac{1}{2}$  separatum sulphur tingit aquam intimius. Sed color tamen à sulphure, non à tartaro.

Quod



Quod verò dicitur, non tingere linteamina, id quidem verum est de aqueis, & ex parte citrinis urinis, sed quod vult, non probat. Certum enim est per experientiam, linteamina ab urinâ citrinâ sanorum colorem mutare, tingi verò eadem ab ictericorum urinâ, quid mirum est, ob copiosius sulphur incoctum.

## CAPUT III

De

### *Urinâ quoad substantiam crassâ, tenui & oleaginosâ.*

**I**N urinâ ergò ex supra præsuppositis principaliter spectanda sunt duo: *substantia*, quam præcipuè præbet liquor seu pars serosa, & *color*, quæ efficiunt contenta, seu pars salina & quæ huic implicita sunt. Minus principaliter & secundariò videnda *quantitas* & *odor*.

Per substantiam non intelligitur *essentia*, sed systasis ipsius urinæ, seu modus substantiæ, uno verbo, consistentia, an crassâ vel tenuis, cui secundariò cohærent inde effecta pellucidum & opacum, turbidum &c.

Cum itaque urina sanorum in omnibus sit mediocris, in substantiâ seu consistentiâ nec nimis crassâ, nec nimis tenuis, instar cerevisiæ probè percoctæ, colore citrina, quantitate proportionata, nec odore nullo, nec nimis foetido, ut pluribus dicemus; hinc videndum est: 1. quantum à statu naturali recedat & quomodo; 2. quænam hujus sint causæ, & quid inde significetur.

Quod igitur CRASSAM attinet, naturaliter paulo crassior mingi debet, quàm materia potu assumpta fuit, intelligendo id de crassitie seu consistentiâ potulentorum ordinariâ & de saturatione contentorum, non quæ turbida est.

Crassâ urina dicitur aliàs spissa seu densa, ( licet hæc nonnullis tunc magis ita audiat, cum minus est perspicua, ) quando pars aquosa salinis saturatior est, reliquis & in specie sulphureis & terreis æqualiter diffusis; sive sit clara simul, quod tamen rarius fit & à se-



dimento subtiliori; sive turbida, quod frequentius. Sunt enim, vel confusæ solum tales crassiore particulae, & tunc facile clarescit, vel exacte miscentur, si praesertim salinae copiosiores, tunc diutius crassa permanet, unde consistentia & contenta urinae ad se invicem habent respectum.

Talis urina crassa confici & videri potest, si urinae alumen in aqua solutum immisceatur & confundatur, facta sic praecipitatione & confusione.

Occurrit etiam ratione ætatis plerumque in pueris, qui ob *αἰδὸν Φαγίαν* plurima colligunt excrementa, unde & in iisdem nihil mali notat, si intra terminos consistat: item magis in fœminis, senibus, & interdum in voracibus, in quibus recensitis saepe tantum confunditur.

Fit talis urina 1. vel *ratione efficientis*, caloris majoris excoquantis, quando praeusti sunt humores, non aliter ac lixivium, absumptis partibus aqueis, spissescit magis. 2. vel *ratione viarum*, si sunt laxiores, quod in pueris obtinet; vel 3. ob *ipsam materiam*, seu copiam humorum crudorum, seu confusionem & pugnam naturae attendamus.

Significat in genere copiam & multitudinem excrementorum in corpore abundantium, seu id fiat à malà dispositione, unde in hydropicis circa finem talis occurrit quandoque, item in ictero; sive ab errore diætæ.

In specie 1. malam coctionem. 2. Si crassa sive densa, & perturbata, ut nihil deponat, talisque maneat, instar jumentorum, alba simul vel rubra sit, significat elogio *Coi* capitis dolorem vel praesentem, vel futurum, 4. *aph. 70.*

3. Urinam crassam existentem, semper purgandum innui, etiam crudo morbo, assertum est *Martiani p. 433.*

4. Bona est in calculosis, ictericis, arthriticis, significat enim propulsionem materiae à natura factam, praecipue si tenues praeserint.

5. Id ipsum etiam si fiat in febribus, ut ex tenui aquosa saturatior & crassior fiat, bonum est, notat enim coctionem sive separationem excrementorum factam.

Per coctionem vero h.l. intelligitur



teligitur *πενεσμός* humorum, quatenus denotat correctionem quandam à naturâ factam & separationem consequentem.

6. Urinæ à principio crassæ, grumosæ & paucæ, si morbi progressu attenuentur, malæ non sunt 4. *aph. 69.*

TENUIS contra ea urina est, quæ multas habet partes aqueas, salinas terreas paucissimas, adeoq; minus saturatus est liquor contentis, & è contrario non multum crassior, sed ferè tenuior est materiâ assumptâ. Quod si parum sulphuris incoctum sit, dicitur *tenuis & biliosa*, quæ simul *rubra & flammea*: si minus, *aquosa, pallida*.

Fit itidem tenuis, vel *ob dispositionem morbosam*, quæ potissimum considerationi subicitur, vel *ob errorem externum*, quæ minus. Si hic commissus sit, fieri aliter non potest, quin ob abundantiam aquosarum particularum minus fiat separatio utilium & inutilium, sive coctio. Vel quando non separantur ritè particule salinæ, sulphureæ, terreæ, quas oportet esse incoctas & commixtas, vel quando separatæ non emittuntur.

Non separantur, ideoque observatur v.g. 1. à potu nimio, adeoque objecto improporcionado; 2. à coctione debili seu vitiatâ, adeoque 3. à calore debiliore seu intemperie frigidâ, quod vitium vel ventriculi est, ubi rudimentum accipere diximus urinam, vel perficientium & depurantium viscerum, ipsiusque sanguinis & temperamenti, unde in phlegmaticis talis est & senibus.

Non emittuntur, vel *ob obstructionem meatuum & pororum tubulorumve in renibus & ureteribus*, quando confundi urinæ solita resistant, neque percolantur, nisi tenuiora, relictis crassioribus, quod sæpè fit in calculo; vel *ob renum calorem nimium*, unde fortius trahunt & liquant, ut in diabete; vel *ob raptum aliorum*, uti in arthritide, epilepsia, phrenitide aliisque morbis tenues observantur urinæ.

In genere ergò significat, salia excrementitia tartarea vel non separari, vel retineri in corpore.

In specie, in febribus præsertim continuis cruditatem denotat, (omnis enim tenuis & aquosa urina, quæ sine sedimento est, cruda dicitur) hinc tunc purgandum non est, hinc crisin nondum fieri,



sed morbum contumacem & rebellem esse, vel recidivam metuentam, & si continuet, deliria, mortem portendit. Fulva etiam & tenuis urina morbum inconcoctum significat, quod bene notandum.

2. Notat aepfiam, cachexiam, in virginibus chlorosin, dispositionem ad hydropem, aërosin chyli impeditam, & hinc cummulata excrementa, obstructionem viscerum, uno verbo, non decenter se habere culinam primam.

3. Occurrunt etiam in nephriticis, & quamdiu tenues manent, malè habent, quia non emittitur materia tartarea vitiosa, unde in paroxysmis nephriticis praticos decet omninò attendere urinam.

4. Si simul copiosa excernatur, sæpè notat colliquationem humorum. Not. tenuis urina ut plurimum etiam sine notabili odore est, nec facilè putrescit, indicio manifesto, & minus heterogenea inesse, & subtilisatione illà per destillationem microcosmicam, ut sic loquamur, liquorem esse magis evectum.

MEDIOCRIS verò sanorum est, in quâ partes *aquosæ & salinæ* decenter sunt consociatæ, ita tamen, ut inter se sint proportionatæ, aquosa enim est instar solventis, adeoq; pondere semper præcellere debet solutum seu contenta. Est inter duo extrema media, sive medio passu ambulat, in sanis bonam valetudinem, in æg. is reconvalescentiæ certam spem spondet.

De OLEAGINOSÂ urinâ maxima controversia est, & dubia plura apud Medicos occurrunt.

Nominant urinam oleaginosam alii ex parte coloris & substantiæ simul, seu quæ oleum colore & substantiâ referat; alii tantum à consistentiâ unguinosâ, cum perspicuo crassamento, alii tantum contenti sunt, quod reddatur sine stridore & sonitu in matulam.

Nos, ut è labyrintho hoc exeamus, & experientiam nostram simul interponamus, tres diversas hujus species recensebimus. 1. Occurrit *urina pinguis*, quoad contenta duplex: (α.) talis scil. quibus in urinâ adipalis superficies est, teste *Ceo 7. aph. 35.* seu quando pinguedo urinis superstat, seu potius crassamentum quoddam instar



star olei diffusi vel nebulae super aquam, quae pinguedo quasi talis notat incendium ingens in corpore vigere, & fit

1. à renum nimia caliditate, teste Hippocrate l.c.

2. à morbo acuto calidiori; *ibid.* seu in febribus ardentibus, ubi autores statuunt pinguedinem renum liquari. Neque hæc semper mala est, quia significat irritationem naturæ à morbo se liberare contententis, unde judicationem celerem quandoque significat. *Hipp. f. 3. coac. vers. 283. & ibidem Martianus in comm. p. 603.*

3. à συντήξει seu colliquatione, in hecticâ, phthisi & diabete quandoque, pessimum signum.

4. Vidimus sæpius in calidioribus naturis, qui abundant bonis succis cum quâdam acrimoniâ, & benè comedunt, sæpè lateribus matulae se affixisse materiam seu crustam quandam sebaceam, pinguem, sine ullâ noxâ, etiam sanissimis, illis tamen præcipuè, qui neogami fuere, vel pollutione nocturnâ laborarunt, vel calculo fuere obnoxii.

β. Altera hujus differentia, rarior magis, est, quando non quasi pinguedo quædam, sed reverà talis in guttas dispersa per urinæ superficiem conspicitur, quæ malignæ colliquationis signum est; & malum præbet omen. Differunt vero hæ ut magis & minus.

Secundò urina dicitur oleaginosa tota quoad substantiam, saltem analogicam, quæ sine sibilo exit. Hanc equidem ferè semel tantum vidimus in quæstore quodam, hypochondriaco desperato, cui mucosa quasi & tam spissa fluebat, ut exprimi deberet, & extendi posset, & illam dari rarissime credimus; si tamen id fiat, τὸ γλιχρὸν unguinosum, quòd ab assumtis assimilandum erat, seu partes sulphureæ balsamicæ ab exuperantibus salinis, & calore hecticò subjugantur, & penitus solvuntur, unde in phthificis consummatis apparere queunt, desperato cum prognostico.

Refertur etiam à nonnullis ad substantiam urina turbida, ab aliis verò inter qualitates ejusdem recensetur, de quâ inferius dicemus.



## CAPUT IV.

De

*Urinâ quoad quantitatem spectatâ,  
copiosâ & paucâ.*

**Q**UANTITAS urinæ spectari debet, tum *continua*, tum *discreta*. In fanis enim & ægris copia urinæ æstimanda est & mensuranda juxta copiam potus adsumpti, non quidem strictè & ad pondus seu mensuram, sed circiter, ita, ut proportio observetur, & multo assumpto potu, copiosa etiam urina, & vice versâ excernatur. Et in genere excrementa ingestis debent respondere.

Deinde etiam æqualiter mingi debet, tam manè, quam vespere, seu proportio debet fieri etiam ratione temporis, non frequentius hæc vel illâ horâ.

Deniq; simul & semel sequi debet, & ἀθρόως confertim excerni, non cum substillo, non cum labore & difficultate.

COPIOSIOR urina excernitur vel culpâ materiæ seu liquoris, vel efficientis specialis renum, vel universalis ipsius naturæ, vel denique causæ instrumentalis seu caloris.

Sic 1. potu copioso assumpto copiosior redditur, sine malo omine, præsertim si exercitia corporis intermittantur.

Sic 2. abundante in vasis ferosâ humiditate, id ipsum quoque contingit cum ὁφθαλμία, unde in hydrope, cachexiâ & arthritide, si copiosa excernatur urina, bonum est signum. Sic quando renes sunt calidiores & avidè nimis serum attrahunt, ipsumque hoc quasi vappescit & acescit, ut in diabete solet fieri, multa aquosa & tenuis excernitur urina. Sic à diureticis assumptis, tum propriè dictis, calidioribus, tum aliis impropriè dictis funditur magis sanguis & urina pellitur. Sic à robore naturæ non impeditæ in crisi per urinam fit evacuatio copiosa. Nihil enim paucum criticum. Impedita verò si fuerit, & ob calculum, vel aliam causam aliquandiu non emiserit, hinc copiosius amandat. Sic à colliquatione humorum copiosa urina excernitur in hecticis & malignis &c. Semper verò



verò benè distinguendum est inter symptomaticum & criticum urinæ copiosum profluvium.

3. Sic, si sudor & alvi egestio pauca sint, copiosius mingitur. Notandum enim, quod tria hæc se modificent, seu augmentata se diminuant, & diminuta se invicem augmentent, sudor, alvi egestio & urina. Hinc si transpiratio seu diaphoresis corporis sit minor, urina copiosior redditur, eadem enim urinæ & sudoris est materia, & vice versâ. Hinc experientiâ constat, plus mingi hyeme communiter, quàm æstate, hinc totâ nocte, ubi pori sunt patuli propter calorem, non mingimus; manè verò aëre expositi libero statim sollicitamur. Hinc regula est *Sanctorii*: qui plus mejunt, quàm bibunt, parum vel nihil perspirant.

Quoad *sexum* plus multò mingunt mulieres viris, cujus rationes videri possunt apud *Savonarol. de urin. c. 7. p. 703.* sunt enim feriores, ubi tamen cautelam practicam addit, ne decipiatur Medicus ab iis, quod frequenter non ostendant totam quantitatem urinæ, ne ex tantâ mole Medicus judicet eas multum potasse.

PAUCA URINA ab iisdem, sed contrario modo habentibus causis, oritur; In excretionem urinæ ut & purgatione spectanda sunt, & requiruntur 1. liquor, 2. viæ, 3. natura, archeus seu facultas expultrix. Cum ergo pars potissima urinæ sit serosa, hinc in genere parcius urina exit, ob omnia ea, quæ serum proximius, vel remotius minuunt, divertunt, vel impediunt separationem & excretionem.

Imminuunt inedia, calor febrilis absumens &c. Divertunt, sudores copiosi, fluxus alvi, vomitus, collectio in abdomine, unde in reddendâ urinâ Eucliones sunt hydropici; mens laborans, unde Phrenetici paucum excernunt.

Impediunt, ratione viarum, calculus, obstructio ureterum, renum, vesicæ; ratione naturæ facultas emoriens, compressio in gravidis, in stranguriâ acredo &c.

In infantibus quoque inprimis spectanda est urinæ quantitas, illi enim frequentius solent mingere, quod si non fiat, nec lintamina deprehendantur uvula, pessima sæpè inde symptomata, inprimis epileptica subsequi solent, quo casu commendatissimum est semen lycopodii.



Patet etiam ex his obiter, quomodo instituenda curatio, & parciore sit urina; natura scilicet roboranda, sphincter imprimis vesicæ, oleis nervinis, sacculis ex allio, cepis; viæ aperiendæ, grumositates & obstructions tollendo, cerefol. nephriticis, salibus; serum ipsum augendum, & quæ alia se offerunt, aliunde petenda.

## CAPUT V

De

### *Coloribus urinæ.*

**C**OLOR urinæ quàm optimè statum caloris in corpore humano patefacit, uti enim ille vel in excessu p. n. existit, aut in defectu peccat, ita etiam varietas coloris in urinâ videnda est. Si color sit paucus, paucae particulae sulphureæ illi immixtæ deprehenduntur, uti etiam paucae salinae aliæ, adeoque color sit aquosus, tenuis.

**A L B A** urina dicitur vel improprie vel proprie. Improprie seu latius alba urina dicitur & est tenuis, aquosa à consistentiâ & colore aquæ, pellucida, quæ suos habet gradus & latitudinem, prout v. g. æmulatur crystallum, aquam, serum.

Spoliata est tincturâ solitâ, ob sulphureas particulas, uti diximus, deficientes; deficiunt particulae sulphureæ à calore debili, tùm suâ naturâ & in se, tùm respectivè, ratione materiæ in quam agere, & viarum, per quas evacuari debent.

Suâ naturâ, quando deficit vel ob ætatem, hinc urina senum est tenuis & alba, vel exhaustus est & deficit, ob morbos chronicos, ob depauperatum spiritibus suis sanguinem, à crebrâ missione sanguinis, à cachexiâ, chlorosi, aliisque morbis, ubi oleosæ particulae subjugatae sunt reliquis, unde etiam à phlegmaticis eadem mingi solet; vel ob ventilationem prohibitam, cum torpidus redditur otio, defectu exercitiorum & motus.

Ratione materiæ aquosa & albicans redditur, à potulentorum, item ab excrementorum crudorum copiâ, quæ ipsum obtundunt, à diureticis assumptis, ab obstructionibus viarum, unde crassa remanent, nec legitima fit separatio, vel ob aliorum raptam materiam,



materiam, ut in phrenitide, dysenteria, erysipelate; hinc urina talis albicans adest in cruditatibus, in hydropis initio, quod hinc indicat. Solent enim hydropicorum urinæ primis incunabulis ferè esse aquosæ. Notat *πυκνωσις* defectum, adesse etiam solet in nephriticis, quibus ut plurimum simul ventriculus maximè compatitur, & vomitu affligitur. In febribus summam humorum cruditatem, adeoque non purgandum, & si calor simul continuet, delirium, & in febribus ardentibus ac phrenitide ut plurimum mortem prænunciat. Vid. 4. aph. 72.

Mala est in ictero, cui minatur hydropem, mala etiam præcipuè in pueris l. 2. prognost. quia horum urinæ debent esse crassiores, adeoque significat magnum à statu naturali recessum, quippe iis calidum vividius debebat esse. Si cum siti & copiosior diabetem significat; ideoque aliæ circumstantiæ simul pensitandæ.

Propriè alba urina dicitur, quæ ob contenta albicat & crassior est.

Habet hæc itidem suos gradus, unde in specie vel lactea est, milchfarbig / vel glauca Lichtfarb / quando instar cornu pellucidi se habet, & in primis charopus color dicitur, qui dilutam habet viriditatem, igneo quodam splendore intermicantem, qualis in leonum oculis conspicitur.

Talis alba crassa fit ob copiam excrementorum, devicto quasi calore, & admixtâ in specie pituitâ, cujus abundantia in sanguine innuitur. Subsidet hæc materia maximam partem, quædam vero liquori permixta natat. Notat eadem ferè quæ prior, nisi quod excrementa mucosa in sanguine magis abundare denotet.

In specie tria recensentur, quæ albam & crassam urinam reddere solent & possunt, chylus, pus, semen.

Per chylum intelligenda est crudior & chylosior sanguinis pars, seu potius pituita. Notandum est, cum hæc tria eodem se offerant colore, distinctione opus esse, ut differentia eorundem pateat, quam in primis præ aliis retulit Heer. obs. 18. p. 231. 1. Semen, quod admiscetur in gonorrhœâ vel statim post coitum, supernatat, nec facile subsidit etiam agitated, nisi ex parte in gonorrhœâ virulentâ. Tale si offeratur, potest gonorrhœa vel pollutio nocturna dignosci & colligi.



2. *Pus* præter id, quod vel antecedit urinam vel sequatur, fundum magis petit, & agitatione dissipatur omnino, vel diffilit, ut visum penè fugiat, & urinam, ut loquitur Heer. galactoidem exhibet, pars tamen crassior hinc inde rotari solet quandoque. Hoc in ulceratione renum quandoque contingit, in lue venerea etiam & nonnunquam in foeminis ex utero.

3. *Pituita* verò fundum constanter petit, & si gyretur, statim tamen in locum pristinum subsidet. Talis occurrit in fluore albo laborantibus, & quibus balsamum sanguinis, bilis, ob cruditates collectas, maxime ob humidiores victum deficit, unde eo casu ad cachexiam viscerum respiciendum, nec negligenda utrobique aromatica, calorem & coctionem roborantia.

Occurrit etiam talis urina albida in pueris, calculo vesicæ laborantibus, præsertim si simul sit farinacea. Sæpè tamen vidimus à solâ ἀδὸν φαιά eandem prodire, sine ullo malo signo. Interdum etiam à vermibus idem observatur, unde benè circumstantiæ considerandæ, & pro re natâ purgantia propinanda sunt. Significat etiam communiter destructionem appetitus, & primam culinam non benè habere.

Quò magis secedit color à citrino naturali, eò pejus habet, de cuius prædictione legi meretur *Willisius tr. de urin. p. 367*. Incutit metum hydropis, tumoris pedum, inflationes notat & alia his consuetaria.

Sicut verò citrinus naturalis est, & temperatum calorem esse notat, aquosa contra ea deficere; ita quicunque colores citrinum superant, calorem p. n. in genere seu universaliter significant, sive febrim sive intemperiem particularem huius vel illius visceris, nominatim hepatis, pulmonum, copiam excrementorum biliosorum &c. unde tunc ut plurimum sine errore licet præfagire calorem.

FLAVA urina dicitur, quæ citrinitatem vel aureum colorem transcendit, à croco, cuius essentiam vel infusum æmulatur, *crocea Cassrangelb* dicta, quæ saturatior est, quæ plurimis biliosis seu sulphureis & terreis particulis pollet, & tincta est. Si adeò id fiat, ut linteamina tingat, certissimum & infallibile νεφελιον est icteri sive imminentis, sive præsentis.

Tingitur urina plus debito vel à causis internis jam dictis, vel externis,



externis, ut motu nimio, item assumptis, rhabarbaro, curcumâ, rubiâ tinctorum &c. Hinc exhibenda tunc sunt bilem temperantia, obstructionem pororum ejusdem ductus tollentia, acidiuscula, salina, absterfiva & imprimis martialia, quæ vel sola icterum curare possunt.

Subflava seu citrina sanorum est, unde & subspicea, seu palea-  
ris melior est subalbidâ, quia statui naturali proximior, notat calorem & coctionem bene habere.

Not. verò urinam naturali consimilem occurrere quandoque in acutis & chronicis morbis.

1. In acutis malignis ut pulsus naturali similis est quandoque, ob intimiorem & volatiliorem malignitatem sanguini nuptam, ita etiam urina, unde cautè tunc mercandum, nec salus temerè ex hac prædicenda.

2. In chronicis morbis, qui diu durant v.g. phthisi, affectu hypochondriaco &c. sæpè etiam observantur similes naturalibus, quando habituum jam est malum.

FLAMMEA seu ignea & ruffa dicitur, quæ cum fulgore rutilat, adeoque intensiorem notat caloris. Ut spiritus nitri si destillatur, prodit per retortam in recipiens rutilans, cum ipse tamen sit albus, ob partes sulphureas salinis immerfas volatiles, & calore ignis rarefactas & agitas; pari modo urina talismodi denotat partes salinas quidem multas, sulphureas verò maxime volatiles lotio admixtas. Talis si offeratur, tertianam ut plurimum notat, præprimis si circa paroxysmi tempus excernatur, tunc enim in motu & ebullitione partes illæ sunt, quare bene distinguenda sunt & h. l. tempora. Intensio talis coloris sæpè in tertianis magis occurrit, quàm ardentibus, in his verò ipsis quoque videnda est non rarò.


Adeoque *ruffa* urina vel subruffa semper excessum caliditatis magnum arguit, & prædominium bilis in corpore. Danda tunc præcipitantia, quæ sulphur evectum domant & temperant, qualia sunt febrifuga, non omissis diluentibus. Et hæc magis est tenuis & biliosa.

Urina rubra verò, quæ magis crassa est, h. l. non tam ea attenditur, quæ ab assumptis mutuatur tincturam, à jure cicerum rubrorum, rubiâ tinctorum aliisque tingentibus, quàm ea, quæ domestico humorum vitio confit.



*Subrubra* hæc urina & rubra, habent enim suam latitudinem, reperitur quoque vel cum feбри, vel sine feбри.

Si cum feбри accidat, semper videndum est, an sit rubra subtilis seu tenuis, an verò crassa, seu cum sedimento. Tenuis crudtatem, & periculum minatur, & æstum summum notat. Crassa verò, i. e. cum sedimento subrubro, dilui eandem bilem sero indicat, adeoque inchoari coctionem, seu secretionem, unde certam quidem & bonam spem præfagit recuperandæ valetudinis, & sine periculo statum ægri esse, sed longiorem futuram ægritudinem, quia humorem minus naturæ subiectum notat, quàm si sedimentum haberet album, læve & æquale, quod morbum mitiorem significat; unde rubea urina cum sedimento albo dicto, completam coctionem, & citum levamen portendit.

*Citra febrim* urina rubra fit, ob præsentiam salium lixiviosorum & sulphuris sylvestrii in M. S. & fit 1. in *scorbuto* & affectu hypochondriaco consummato, in quo, ut & cachexiâ scorbuticâ, segregatione materiæ tartareæ minus factâ, in principio urinæ tenues, aquosæ vel subcitrinæ, hinc paulo crassiores cum albore & subsidentiis pituitosis, tandem, corruptione majori in humoribus existente, fiunt rubræ, lixiviosæ, quod & fit, verbis *Willisii*, ob fermenta viscerum plus debito exaltata vel depravata l. c. p. 338. adeò ut & arenulæ rubræ adhæreant matulæ, & lateritius  rus copiosè fundum petat. *Langius* ob obstructions & humorum putredinem id contingere ait l. 2. ep. p. 751. Adest etiam simul sitis. Unde si non tingant tales urinæ lintea, indicium certum scorbuti exhibent plerumque, vel cachexiæ scorbuticæ.

2. In *magnis doloribus* inprimis colicis, qui cum nephriticis magnam habent convenientiam, & sæpè fallunt Medicos.

3. In *hydropicis*, quando enim viscera jam sic satis sunt de tono suo dejecta, & à lixivioso sero corrupta, vel scirrhusa quoque, solent præbere urinas rubras crassas, ubi magis conveniunt nitrofa, arcanum duplicatum *Myns.* & alia temperata; rarò tamen tunc evadunt, unde si hydropicus urinam albam offerat, melior spes erit concipienda. Rubra verò & pauca in hydropicis pessima est.

4. In *hepatitide*, vel etiam *hepaticis*, ubi interdum instar loturæ carnis etiam urinæ perhibetur, quod tamè non observavimus. Designat tunc frigiditatem & laxitatem viscerum.

5. In



5. In *Phthificis*, *arthriticis*, *erysipelate* interdum etiam occurrunt, in phthificis tamen id fallit sæpenuerò. Urinæ enim phthificorum sunt inconstantes, non raro vix certi quid pronunciantes, præter calorem p. n.

Videndum verò semper est, an crassa simul sit, an tenuis Præstat tamen in morbis acutis urinam esse rubram, quàm aquosam. In genere rubra urina tenuis bilis & sulphureorum cum salinis abundantiam & sanguinis incendium notat.

6. Etiam à *renibus debilitatis* læsisve urina rubra & cruenta oritur, ubi notandū maximè distinguendum esse, juxta *Duretum*, inter sanguinem emictum & sanguineam urinam.

*Mictus cruenti* calculosis sæpius contingunt, ob læsa vasa à calculo, unde balsamica demulcentia conveniunt, *terebinthinata*, *traumatica*, *anodyna* &c. internè & externè, & redduntur quidem tales urinæ cruentæ sine dolore. Malæ sunt in febribus malignis, ( licet nonnulli criticas esse velint ) denotant enim naturæ ultimum conatum & sanguinis resolutionem.

Quæ verò sanguineo colore tincta est, seu sanguinea urina cognosci potest ex sedimento, quod offert grumescens, foedum, rubens vel nigricans, adeoque satis certò dignosci potest.

Notandum tamen, ne Medicus fallatur circa hunc casum, nam in foeminis mensibus laborantibus tales quandoque offeruntur urinæ, ne quis eas statim laborare mictu cruento pronunciet, quærere idcirco tùm consultius est, quàm falli.

Affinis huic est NIGRA, Urina nigra duplex est, tum *substantiâ* talis, tum *contento*. Hæc respectivè melior, illa pejor, pessima quæ utrumque simul conjunctum habet.

Gaudet verò hæc quoque latitudine suâ, & sub se comprehendit *viridem*, *lividam*, *fuscam*, quæ vel præcedunt, vel sequuntur, vel æmulantur nigram, & fusca in specie in icteritiâ nigrâ occurrit.

Urinæ nigræ ut plurimum simul sunt crassæ. Periculosissimæ judicantur urinæ nigræ à *Galeno*, adeò ut *l. 1. de cris. c. 12*, neminem cum iisdem servatum viderit. Sed cum experientia testetur contrarium, & ipse *Hipp. l. 3. epid. s. 3*. tale exemplum habeat, causæ sunt videndæ.

Occurrit verò talis urina quandoque 1. in *hypocondriacis*,  
*scorbu-*



*scorbuticis, quartanariis*, (qui posteriores urinis nigris non rarò iudicantur, seu urina nigra quartanam sæpius solvit;) & *arthriticis*, qui sunt cognati affectus. Fit hoc tum à martialibus exhibitis frequentius, quæ non tantum ordinariè dejectiones nigras reddunt, sed quandoque etiam urinas ita tingunt: tum ab humoribus tartareis, acidis austerisque atomis unà cum sulphure refertis, præsertim quando diutius morbus jam duravit. Vidimus tales urinas aliquoties cum levamine, in paroxysmo arthritico ab hypochondriaco excretas, & alias.

2. In *melancholicis*, uti enim hæmorrhoides & dejectiones cruentas, ita & urinam nigram quandoque exhibent, unde delirium melancholicum solvitur.

3. In *calculosis* & renum affectibus aliis, quando partes terreæ crassiores adustæ in renibus resolvuntur cum partibus salinis & secedunt.

4. In *retentis mensibus*, quando matrix purgatur & à sentinâ cruoris restagnantis se liberat, unde etiam *Ebusinâ* autore, quandoque in gravidis urinæ nigræ excernuntur, instar vini nigri corrupti, quando sanguis restitat.

5. In *ictero nigro* etiam quandoque vel apparenter tales, ob biliosas particulas tinctiores, vel reverà tales redduntur, & in his ut plurimum salutare sunt, vel saltem innoxia.

6. In *malignis*, in quibus iudicatur criticè etiam quandoque posse excerni, sed rarius id fit cum levamine, quin eo casu crudittatis id signum est sæpè extremum. Ideoque ut iudicium ferri possit de his urinis melius, notandum est comparandas eas esse cum ægri statu, cum symptomatibus, an prava simul conjungantur nec ne. Porro ad viscerum constitutionem respiciendum est, nam plerumque singularem corruptionem (cei gravissimam causam) metuendam innuit, seu *κακωσιν μεγάλην* viscerum. Hinc observavimus ægros tales facile incidere in hydropem & eodem mori. Deinde ad vires & tolerantiam, an cum *Ἐφορία* id fiat, nec ne. Denique ad ætatem, peiores in senibus, minus malæ in pueris esse consueverunt.

*Livida* convulsivos morbos signat, qualem in serosioribus, cachecticis, spasmodicis symptomatibus afflictis nō semel notavimus.



## CAPUT V.

De

*Urinâ turbidâ, clarâ, ejusdemque odore.*

**A**D substantiam urinæ etiam referri potest ejusdem CLARITAS & TURBULENTIA.

Ut hæc melius pateant, notanda est differentia urinarum turbidarum, vel enim est statim turbida ab emissionē, vel clara, & talis vel manet, vel alteratur. Hinc 1. κατ' ἐξοχήν dicitur *turbida*, quæ emittitur turbida, talis tamen esse desinit, per quietem & subsidentiam vasis.

2. *Turbata*, quæ pura quidem seu clara redditur, turbatur verò post citius vel tardius.

3. *Confusa*, quæ & minguntur turbidæ, & tales manent, & hæ sunt, & dicuntur esse instar jumentorum.

Turbatur urina vel ex se, vel ab aëre, vel ab utroq; simul. A frigore quamvis urinam contentis saturatiorem turbare notum est. Turbatur verò urina clara emissâ, potissimum si contenta sunt subtiliora paulò & leviora, adeoque undique dispersa, clarescit vice versa turbida, si contenta sint graviora, & feculentiora, quia partes sunt heterogeneæ, quæ in liquore beneficio caloris sub uno tenentur jugo, ut videantur homogenea, exspirante seu exhalante verò calore sensim secedunt, quod si etiam calori iterum exponantur, reducuntur ad pristinam claritatem & formam. Hinc in usu est Medicis, urinas calore reducere; hinc si eadem reduci possit, hoc modo & clara fiat, ab aëre potissimum turbatio inducta innuitur, & contra. In confusâ verò urinâ, talia heterogenea exquisitius, & quidem mediante copiosiori sale immixta sunt, ut à frigore minus separari queant.

Turbata itaque hoc modo inter reliquas optima est, quia notat 1. separationem fieri & coctionem imminere, 2. adeoque urinam contentis saturatam, licet 3. aliqua adhuc cruditas adsit.

Notandum enim 1. quod h. l. solùm sit sermo de talismodi u-

D

rinâ



rinâ ægrotantium, non sanorum, in quibus notum est, etiam turbam aliquo modo post aliquod tempus reddi eandem; cum igitur hæc ad statum naturalem præ reliquis magis accedat, ideoque etiam melior judicatur.

2. Notamus turbulentam dici, non tam ratione sedimenti, quam totius substantiæ, adeoque simul fit opaca, unde Germanis *trübe* dicitur.

3. In fanis sæpè instantem morbum notat, quia excrementorum copiam innuit.

4. Bona est in nephriticis, significat enim resolutionem tartarei coaguli.

5. In febribus cruditatem quidem adhuc notat, sed coctionem tamen incipi.

Turbida verò medio modo se habet, quæ scilicet turbida emissâ clarescit, materiâ excrementitiâ ad fundum præcipitatâ. Fit hæc vel ob admixta aliena pus, sanguinem, vel proprias feculentias. Illa ruptionem vel læsionem vasorum & parietum notant, hæc copiam humorum crudorum, eorundemque turbationem, cessare tamen fermentationem, & naturam secretionem instituere; adeoque rectè dicitur signum bonum esse in febribus.

Confusa denique, quæ est & manet turbida, peior est, nisi prægressa fuerit tenuis & perspicua, notat enim insignem humorum confusionem & fermentationem; deinde copiam excrementorum, & hinc ob calorem conjunctum & agitationem ad caput latorum; notat juxta 4. *aph.* 70. dolores capitis vel imminentes vel præsentés.

Notant etiam sæpè catarrhos, affectus soporosos, coryzam, in pueris tamen sæpè *αδδν Φαγίαν*, ideoque semper simul considerandus est color & aliæ circumstantiæ. Si rubeat vel citrina sit, simul, pessimum est, & non rarò malignitatem habet conjunctam, viriumque debilitatem. Sin albicans color sit, abundantiam pituitæ notat, quæ si concreseat, facile in coagulum tartareum degenerat. Turbida urina repræsentari commodè potest, si solutio aluminis cum eadem confundatur.

*Clara & perspicua* æstimanda est tum secundum colorem; si color citrinus, bonum est, sin albicans malum; tum secundum  
sedimentum,



sedimentum, quæ sedimentum habet, bonam affert spem, quæ minus, contrà ; tum denique secundum antecedentia & consequentia, si præcesserit urina turbida, bonum est, sin sequatur, attendendæ circumstantiæ.

Occurrunt hætenus dictæ differentiæ urinæ vñus examini, ut & contenta ejusdem alia, paulò post memoranda ; Suo modo tamen etiam odor attendi debet, sive ab ipsis ægris expressus, neque enim illis propria tam sordent, sive certis de causis exin etiam judicandum sit.

*Odore* etiam mediocris esse debet urina, nec suaveolens, nec foetens, nec nihil olens, qui odor dicitur ipsi naturalis, & à medico quidem non attenditur, nec attendi debet in inspectione, nisi eo casu, ubi fraus patefacienda est, quod tamen rarò contingit. Nihilominus quidam cæcus dicitur ex solo odore potuisse dignoscere urinarum prognostica & signa alia.

Odor naturalis dependet à sulphure & sale benè invicem digestis & proportionatis.

*Nihil olet* duplici modo, & quidem *naturaliter* in sanissimo homine, quando statim post cibum sumptum, prandium vel coenam, vel potum copiosorem excernitur, in destillatione enim hæc naturali urinæ primò aquosius procedit, hinc saturatius, & contentis magis refertum. Insipida etiam tunc est urina. Singulare hoc est naturæ artificium, sibi enim ex assumptis seligere vult, quod ex usu est, hinc igitur primùm aquosius separat, & ex reliquâ massâ nectar & ambrosiam delibat, procedente coctione animali. Naturaliter etiam parum olet ratione ætatis in senibus & pueris.

*Præter naturam* verò id fit 1. quando coctio debilis est, nec resoluta compages assumptorum penitius, sive id fiat ab errore externo, vel à facultate læsâ, unde notat cruditates, indigestionem, inappetentiam ; 2. quando calor debilis est, serum sanguinis præpollet, purpura verò hujus depauperata. 3. Ob sulphuris aliorum raptum, utitenuis & aquosa phrenitidem aliquando notat, unde in acutis mala est.

*Suaveolens* urina à præternaturali re rarius vel nunquam accidit, à non naturali verò re, cibo & medicamentis id evenit, si alterutrum horum sulphure subtili gaudeat copiosius, adeoque in



urinâ, præeunte coctione & alteratione, in corpore explicari possit. Talia sunt oleosa, anisum, moschus, aliaque aromatica, inprimis verò id à resinosis expectandum est ferè ordinariè, mastiche, oleo citri, juniperi, & omnium maximè à terebinthinâ, quocunq̃e demum modo assumatur, in formâ boli, pulveris, olei. Hinc ut plurimum urina suaveolens, quæ odorem scilicet violaceum, seu iridis Florentinæ æmulum refert, nuncia non mendax est terebinthinatorum adsumptorum. Sic à balsamo sulphuris etiam idem contingit, ex quo obiter patet, quantam vim habeant hujusmodi oleosa, in sanguinem, fundendi, fluxilemque reddendi, & sulphur imperiendi, cum id & excrementa redoleant, unde obiter addimus, quod ex hoc deduci potest, terebinthinata præcipitare ad renes obvios tum humores, tum corpora solida, ut calculos. Humores; hinc n. observavimus, à balsami sulphuris terebinthinati usu quandam studiosum incidisse in diabetem, hinc siccioribus & calidioribus eadem in oleosâ formâ minus conveniunt. Calculos; unde in paroxysmis nephriticis illi medici sæpè & ægros in perniciem, & se in famæ dispendium conjiciunt, qui terebinthinatis & pellen- tibus fortioribus sabulum vel calculum jam concretum expellere satagunt, inde enim id commodi habent, quod calculus faciliè præcipitetur in ureteres, cum metu ischuriæ & sinistri eventus. Sin nondum concretus sit, absumptis partibus tenuioribus faciliè promovent coagulationem magis, illamque præcipitant, & id quod tollere volunt, juvant potius, quæ regula & observatio est ipsius *Galenî l. 14. meth. med. c. 3.*

Est tamen, ubi locum sat commodum inveniunt in mictu cruento, ulceribus, gonorrhœâ &c. Nos tantum de abusu diximus.

Discere & ex hoc licet naturæ providentiam, quæ, ne sulphure peregrino inquinetur plus justo massa sanguinea, partem urinâ prodit, & se hujus separationem instituere testatur.

Faciunt odorum urinæ speculationes ad informandos ægros, quibus talis odor primò offertur, quibusque, ut diximus, non grave est propriam cloacam odoratu percipere. Si ergo fœteat, & de malo odore oriatur quæstio, considerata sunt tum *adsumpta*, tum *contenta* urinæ penitius.

Quærendus est æger, sanusve, qui morbum ex fœtore hoc  
timet.



cimet, an assumerit cibo caseum veterem paulò copiosius, an allium comederit (de aniso enim, quod quidam hîc referunt, dubitamus) an turiones asparagi assumpserit frequentius, vel saltim in genere: quo victu utatur.

Quod si ex hoc causa se non offerat manifesta, ex contentis elicienda erit, videndo, an pus admixtum sit, quod vel gravius olentem solùm, si laudabile sit, vel foetidam reddit urinam, sin minus & ex vesicâ provenit, an squamulæ, aliave signa renum vel vesicæ, utriquè affectorum, & imprimis ulceris se offerant, an dolor, an contusio, an lapsus præcesserit. Si ischuria prægressa est, illi vitium imputandum, ut vitium capiunt, ni moveantur aquæ.

Sin malignitas simul conjugatur, & extra diem criticum urina foetida reddatur, quod tamen rarissimè occurrit, putrilaginem humorum, interdum etiam hujus vel illius visceris interni sphaecelum, designat.

## CAPUT VI.

De

### *Contentis urinæ.*

**D**iximus superius, duo esse in urinâ quâlibet attendenda, liquorem & contenta. De liquore igitur cum egerimus, jam aliquid de contentis dicendum erit.

CONTENTA hæc vel *naturalia* sunt, vel *præternaturalia*.

Contenta naturalia re unum sunt, nomine tria, à tribus regionibus, infimâ, superiori & mediâ matulæ seu urinalis distincta.

*Sedimentum*, quod in fundo subsidet, primum est, hoc inferiorem locum occupat in vase, primum in mente, de quo notandum, 1. *an sit*, an in omnibus reperiatur. Communiter tantùm in frigidioribus innuitur dari, in calidioribus minus. Id verò intelligendum est, quoad sensum, & quantitatem potius, quàm existentiam, dari enim idem in sanis, à posteriori demonstrant sordes in matulâ se offerentes. Plus scilicet sedimenti est in frigidioribus, minus in calidioribus.

Si enim attendamus 2. *quid sit*, scilicet superfluum crassius,

D 3

quod



quod ab alimenti ultimâ portione assimilari non potuit, & à fero sanguinis secessit, nemo dicere potest, non in calidioribus etiam, licet minus, aliquid relinqui superflui, seu non omne à calore temperamenti, vel motu & laboribus posse absumi. Contenta enim cum liquore æternum habent fœdus. Nullum igitur est ad sensum solum.

Continet hoc sedimentum, ita stricte dictum, in genere, ut innuimus, partes graviores, in specie tartareas seu terreas, salinas.

3. *Quale sit* sedimentum, ex his elucet, substantiâ scilicet nec nimis crassum, nec nimis tenue, subtile, sed leve, non grave, unde solent id nonnulli comparare cum sedimento, quod in aquis destillatis, v. g. aquâ rosarum apparet; quantitate mediocri seu paucum, æquale, continuum seu potius contiguum, non divulsum, situ in medio pendens, quo ad initium, figurâ pyramidale, non quidem mathematicè & stricte, sed analogicè; qualitate in colore albicans; tempore non nimis citò, nec tardè nimis, sed circiter post sextam horæ partem, vel paulò amplius apparens.

Usus breviter hunc citamus; 1. semper melius est, adesse sedimentum aliquod, quàm nullum; 2. in quibus paucius est, calidiores, in quibus copiosius, frigidiores sunt, hinc in obesis, fœminis, otiosis, copiosius deprehenditur.

*Enæorema* sunt partes sedimenti subtiliores & leviores, instar subtilium nubium ad medium vergens, & fundo innixum. In calidioribus rectè scribitur apparere, quia pauciora gignunt excrementa, & omnia sunt activiora.

*Nebula* seu Nubecula in sanis rarò vel nunquam apparet, interdum tamen in calidioribus, ob partes sulphureas subtiliores defectas, non aliter ac in locis sylvis vicinis tempore pluvio aquæ colliguntur in superficie quasi radiatæ, ob antheras vicinarum arborum & plantarum in aere volitantes & pluvie commixtas; adeoque nil mali notat, cavendum tamen illis est, si continuet, ne calor augef. ens depascat ipsam substantiam solidam.

Quæ itaque ab his deflectunt sedimenta, præternaturalia, & quò magis ab his recedunt, eò pejora habenda sunt.

Eleganter nonnulli superfluitatem hanc contentorum quandoque à nutrimento, quandoque à materiâ morbi decidi statuunt.



Hoc eo sensu jam admittemus, quod contenta & statum naturalem, coctionis naturalis seu  $\pi\acute{\epsilon}\psi\epsilon\theta$ , sanguinis & nutritionis, & præternaturalis in morbis, præsertim febribus, seu coctionis analogicæ,  $\pi\epsilon\pi\alpha\sigma\mu\tilde{\varsigma}$  ostendunt.

Hinc considerata eadem sunt, ratione substantiæ; sunt enim vel *animata*, vel *inanimata*. *Animata*, licet rarius occurrant, sunt vermes, qualem in gonorrhœâ observavit *Borellus obs. microscop.* & notant ut plurimum ulcus alicubi delitescens.

Tale exemplum observavit in se ipso *Cardanus 4. apb. comm. 76.* qui procul dubio simul ulcus quoddam secum habuit, unde à lue venereâ, quâ septies laboravit, ortos credibile est.

*Inanimata* sunt vel *solida* consistentiæ, ut arenosa, lateritia, calculi, pili, quæ mictio pilorum vel vera est vel analogica, vid. *Barthol. de lact. thorac. p. 79.* vel *medie*, carunculæ, squamæ, & furfures in scabie vesicæ, pituita; vel *liquide*, ut pus, semen, sanguis &c.

Medicus in primis considerat arenosa commixta, quæ in calculo & apud hypochondriacos occurrunt & ex hisce conjunctim partim cognoscit morbi quidditatem, seu diagnosin, ulcus, calculum, scabiem, vasorum ruptionem.

Quoad *modum substantiæ*, attendit, an subsideat penitus, an sit crassum, an asperum.

Quoad *qualitatem* & colorem, omnes possunt referri vel ad album, rubrum & nigrum. Album semper melius est, in febribus v. g. notat coctionem; de nigro jam diximus, sit tamen potissimum à grumo sanguinis; in gravidis sæpè instar farinæ seu lanæ carptæ urinæ apparent.

Quoad *quantitatem* adest vel nullum sedimentum, vel paucum, vel copiosum. Nullum sedimentum si adsit, (seu si urina contentis sit privata) neque in fundo, nec medio, nec in superficie, in sanis, si id diu duret, imminere morbum notat, obstructions & cruditates prædominari, incutit metum hydropis, cachexiæ, & pro re natâ icteri.

In ægris summam notat cruditatem & coctionis defectum, adeoque naturæ debilitatem, unde & vigiliæ, dolores sæpè & alia conjuncta sunt; in statu id pessimum est.

Paucum melius est multo, & ab iisdem causis mitioribus dependet.

Copio.



Copiosa verò contenta si sint, in sanis *αἰδὲν Φαγίας* & naturæ robur notat, in ægris considerata sunt morbi tempora; in principio si adsint, longitudinem morbi portendit, naturam quippe morâ egere & robore. In statu cum aliis bonis signis optima sunt, in declinatione etiam, quod de calculo quoque valet, bonum omen præbent, cum reliquis scilicet signis bonis.

In genere in febribus inprimis urinam adspicere debet Medicus, ad coctionem & cruditatem deprehendendam, adeoq; regulæ instar notandum: 1. coctionem ex sedimento, & ejus bonâ qualitate judicari; 2. cruditatem ex ejus defectu & malis conditionibus; 3. ex his longitudinem & brevitatem morbi præcipuè elici posse.

Graviora fundum petunt, leviora in superficie natant, media medium locum occupant.

De contentis tùm generalibus, tùm specialibus in urinâ, imò ipsâ etiam, notandus est locus eximius *Galenî 4. aph. comment. 57.* Cum, ait, ex venis urina veniat, in renibus autem percoletur, in vesicâ verò colligatur, quicquid in eâ præter naturam apparuerit, aut venas seu vasa, aut renes & vesicam malè se habere indicabit, ibidem etiam *aph. præcedente*, elegantissimè differitur de carunculis & pilis in urinâ; in specie carunculæ renum interdum ulceratione in notant.

*Farinaceum* sedimentum si crassius sit, in febribus notat morbum diuturnum, juxta *7. aph. 31.* quia cruditatem notat, si simul aquea sit urina. In ægrotis scilicet urinæ quoad contenta farinæ similes longæ valetudinis adversæ indicia præbent, in gravidis tamen, etiam sanis, observari possunt, quippe nonnulla tenui farinæ, aut amylo similia in illarum urinis, etiâ cum benè valent innatant: in quibus dum quietæ servantur, crassius aliquid, lanæ tenuiter capte instar, in imo subsidet, vel in medio hæret, quod conceptum, indicare sæpius se expertum scribit *Andern. de med. vet. & nov. p. 514.* Tacemus alia superstitiosa & futilia conceptionis signa.

*Squamae & furfures* à colore, figurâ & consistentiâ dictæ, in urinâ notant vesicam excoriari ab acredine humorum, adeoque ejusdem scabiem, *4. aph. 77. & 81.*

*Sanguineum* sedimentum extravasatum alicubi sanguinem notat,



notat, notandum tamen in mulieribus mensibus laborantibus, ne confundantur grumi alii cum his immixtis.

*Pus* aliquando in pleuriticis apparet, naturâ id extraordinariè per vasa ad vesicam amandante. Distinguendum etiam est inter pus & materiam pituitosam viscidam, hæc glutinosa est, illud facilè dissolvitur.

*Bulle & spuma*, externis maximè causis debentur, motui & agitationi fortiori vasis, unde vix attendi debent; sin continent, notant sæpè flatus & obstructions, item defluxiones catarrhales. Si instar telæ aranearum diu durent, renum caliditatem & colliquationem humorum notant.

*Atomi* corpuscula sunt minuta, sæpè arenulas in recessu habentia, immersa urinæ; si diu durent, minantur paroxysmum podagricum, vel arthriticum.

*Filamenta spermatica* notant gonorrhœam, pollutionem nocturnam, paraly sin vasorum genitalium &c.

Si *pinguedo* seu unctuositas supernatet urinæ, id vel à renibus fit particulatim, vel à toto; si à renibus, febris abest, & emaciatio; sin à toto, utrumque conjungitur magis. De hac verò & quasi pingvedine jam supra diximus.

*Circulus* seu *corona*, quod nihil aliud est, quam coitio plurimarum bullularum, majorum vel minorum in superficie, à quibusdam pro certo signo phthiseos habentur, nonnunquam in malignis quoque visuntur.

*Nebula* in superficie apparens sæpè asthma notat, in morbis acutis coctionis sæpè signum est. *Helmont.* ab acore eam deducit.

In primis inter contenta specialiora notandæ sunt *arenulæ*, seu substantia sabulosa apparens vel in fundo, vel in laterib<sup>9</sup> vasis.

Distinguuntur vulgò in albas & rubras, rubræ creduntur renum notare calculum, albæ vesicæ, juxta 4. *apb.* 80. Verum quidem hoc est, sed cum eadem, seu sabulum tale, etiam in affectu hypochondriaco solenniter appareant, indicio salinæ impuritatis & terreitatis, benè ab invicem sunt discriminandæ, licet non tam differant materialiter, quàm formaliter, unde & in arthriticis simile quid occurrit; & fanè affectus hypochondriacus, calculus, arthritis sæpè conspirant amicè, & qui tales arenulas excernunt, non rarò tandem fiunt nephritici,



Not. enim i. id patefieri ab *a djnnēis* v.g. dolore. Sdlor lumborum adfit vel protendatur ad vesicam, si stranguria, à calculo esse probabile est. Sin minus, ab affectu hypochondriaco seu scorbuto.

2. à *contactu*. Colare sæpè ex usu est urinam, ut quæ remanent, optimè contingi & conspici possint. In calculo igitur, vel in fieri, vel in facto arenulæ sunt asperiores & duriores, in affectu hypochondriaco verò detētæ intra pugillos paulisper dissolvūtur.

3. à *duratione & cessatione*. Ab affectu hypochondriaco vel arthritide sæpè per plures annos durant, sine noxâ etiam, quale exemplum præter alios habet *Riverius cent. 2. obs. 13.* in calculo verò sine dolore & aliis symptomatibus rarò diu durant.

Malum quoque est, si ab arenularum retentione dolor accedat, urina evadat tenuis & non saturata contentis, quamdiu verò prodeunt, bonum est.

Notandum quoque est, arenulas modò statim in urinâ excretâ apparere, si sanguis impuritatibus tartareis scateat, modò post aliquod tempus affigi & in lateribus matulæ se exhibere.

Arenulæ verò notant sabulosum calculum, nondum compactum, sed resolubilem adhuc, quod bonum est: ut & si lapilli ipsi simul excreti comminuuntur faciliè, signum bonum est.

## CAPUT VII.

De

### *Urinæ mutatione, & examine quoad pondus, destillationem & presagia.*

**M**utatio in urinâ itidem duplex occurrit, tum ratione liquoris, tum ratione contentorum, ex utroque apparet urinam esse signum fallax, nisi probè dispiciatur.

Variant urinæ in dictis his maximè in substantiâ & qualitate seu colore, pro diversitate rerum naturalium & non-naturalium.

1. Temperamenta calidiora saturatiorem solent exhibere, pituitosiora aquosiora. Mulieres copiosiora & aquosiora,

vel



vel contentis magis refertam præbent, inprimis verò cibus & potus, item motus eandem variant. Qui equitant crebrius, tinctiorem solent reddere, torpidi aquosam, cibi visceri, pituitosi urinam item minus sanam reddunt & arguunt.

2. Ratione ætatis not. quod ex urinis puerorum & inprimis infantium vix aliquid certi prædici possit, cum utantur lacte, & materia tingens quasi submersa sit.

Ad urinæ examen spectant adhuc duo alia: *Pondus* scilicet & *destillatio*.

De PONDARATIONE urinæ vestigium extat apud Hippocr. l. de arte c. 21. ubi præter fluxionum odores & colores, etiam ponderatam tenuitatem ac crassitiem observat. Idem fecit in dialogo Nicolaus Cusanus & alii, qui staterâ urinas quàm accuratissimè ponderare & probare jubent. Vid. Salom. Albert. Orat. de mosch. p. 193. Horstius manu ductione ad medicinam, legitimum pondus esse scribit, si superet aquæ pluvie pondus urina in virili ætate circiter Div. pag. 193.

Lancem hanc inprimis magnificat, & dudum interpolatam, ut vocat Albertus, revocavit in lucem Helmontius, qui tr. scholar. humorist. decept. c. 4. §. 30. latius de eâ agit, & tutam methodum esse scribit examinandi urinas per pondus; quale etiam exemplum habet lib. de febb. c. 5. §. 13.

Et reverà magnus usus esse potest, si curiosus quis esse vult, 1. ad contenta mensuranda. Liquor enim ipse supponitur æquare pondere æquali aquam pluviam, quod superat pondere, contenta sunt.

Hoc præprimis in ictero, calculo & aliis casibus, ubi urinæ redduntur turbidæ vel confusæ, locum habet, unde quasi ad stateram colligi potest certò, quantum indies minuatur morbus vel augeatur.

2. Usus quoque habet hæc ponderatio quandoque in diabete & aliis casibus, ut quantum ab assumptis potulentis excedat, urina, perspicui queat. Unde certum est, pondus urinæ si non ad ad stateram mensuratum, tamen mente ponderatum etiam aliquid conferre. Uti verò in genere solum quantitatem hanc seu pondus & molem contentorum ponderatio respicit, ita in specie, u-



trum salina vel tartarea pars magis præpolleat, è DESTILLATIONE elicitur, quæ quidem non uti & pondus in usu est, à multis tamen commendatur, & fundamentum in re habet.

Requirat vero exercitium destillandi, ut quis exinde concludere possit, quanta fecum vel salis volatilis copia urinæ insit, adde, quod in parvâ quantitate id tam commodè perfici nequit, nisi quis e vaporationem primariò intendat. Speculatio est ingenii, & dividunt hi contenta in vaporosum, ( seu salinum volatile ) aquosum ( seu phlegma ) & terreum, seu caput mortuum.

Cum ergò juxta dictam hætenus methodum inspicienda sit urina, quæ res in se haut fordida nec inutilis est, notamus, duos potissimum abusus circa hanc inspectionem radicales quasi & immedicabiles receptos esse, tum ex parte ægrotantium, tum ex parte medicorum.

Ex parte ægrotantium, pessima illa consuetudo apud vulgum non solum, sed & nobiles & primarios ipsos inolevit, & necessariò semper medico offerendam esse urinam, & in eadem omnia symptomata, omnia accidentia quasi digito monstrari, depictos esse morbos, imò, tam absurdi sæpè sunt, sexum, ætatem, & si dicere fas est, ipsum quandoque nomen ceu in speculo exhiberi, unde contra dignitatem medici judicant, si vel gry addant de personæ & morbi qualitate, ipsum jam visurum bene omnia rati, non opus esse referre statum, sed medici quasi id proprium esse accurati, ut omnia harioletur & promptè edisserat.

Hinc novimus aliquot doctissimos medicos, minus frequentatos, solum ob id, quod divinare ex fordidâ matulâ dubitabant, & renuebant, contra ea verò illi soli ferè inepto vulgo laudantur, qui omnia se posse perspicere fingunt.

Ex parte verò medicorum abusus tum universalis est, quod non cõmuni senatus consulto & unanimi dexteritate has nundinas urinarias è foro medico eliminant, & plebem potius ad signa recensenda assuefaciant, id quod alicubi tamen laudabili cum effectu præstitum est. Particularis verò, quod hi vel illi Medici, nec si de tribu levi, tantillo lucello inducti, urinam promiscuè & semper exposcunt, & ex urinâ judicium de morbo ferunt, & scripto consignant, ceu instrumento, quo confirmant, & testatum reddunt, quantum postponant veram viam procedendi turpi ari. Quoad



Quoad usum ergo verum, regulæ notandæ sunt, tum communes, quæ ipsam inspectionem in genere antecedunt, & urinam concernunt; tum propriæ, quæ in specie iudicium exponunt.

Præsupponitur ergo communiter quoad primum, ut ratione temporis, coctione absolutâ & mane excepta fuerit urina.

Inspicitur verò urina vel domi, ubi valet reductio calore præstanda, & potissimum dicti jam abusus; vel ad lectum, quod melius, ut ex ea cum aliis progressus vel decrementum morbi, coctionis humorum & alia patefiant. Præcipue id valet de febribus, unde signa ab *Hippocrate* ex urinâ prolata pleraque febres concernunt. Hic etiam notandum, quod non semel vidisse sufficiat, sed iteratò, ut mutatio inde colligatur.

Præsupponitur porrò, quoad secundum, urinam non constituere classem signorum essentialiter inhaerentium, seu, ut loquitur *Langius lib. 3. epist. 6.* nulla morborum signa *αὐτοεξιστά* aut pathognomonica per urinam exactè dignosci, sed esse ex ordine post-essentialium, & quidem excretorum.

Hinc si quæritur, an morbi ex urinâ dignosci possint, sobrie respondendum est, quod sic, sed 1. distinguendo inter distinctam & confusam notitiam, seu inter certam & probabilem cognitionem.

2. Inter signa solitariè & conjunctim spectata, nam usu receptum est, nulli signo soli, post-essentiali scilicet, esse fidendum, tum in diagnosi, tum in prognosi, sed semper sunt jungenda. Hinc regulæ instar notandum: Soli urinæ non fidendum, nec credendum, nec ex solâ visâ urinâ præscribenda esse medicamenta. Hinc simul cum urinâ morbi historia, & accidentia pathognomonica unâ declaranda sunt; hinc nullâ expositâ specie facti, seu descriptione morbi, de illius quidditate divinandum vel nugandum non est. Hinc *Damascenus & Rhases l. 6. aphor.* rectè medicos admonent, ne temerè ex urinâ de ægritudine quicquam statuant, nisi prius ægrum viderint, addimus, vel statum ejusdem noverint, nec erubescant, de singulis ægritudinis accidentibus percunctari.

3. Inter iudicium benè præmeditatum ac ponderatum, & temerarium. Festinandum est lentè. Deliberandum & hic est diu, quod statuendum est semel. Nam facilius prædici potest morbi qualitas, quàm quidditas ex urinâ solâ, cum aliis verò & quidditas & qualitas simul tutò ac accurate.



4. In specie etiam non temerè pronuntiandum est de conceptione vel ingravidatione. Sæpissimè offertur medico urina, tum à fœminis uxoratis, tum inprimis à meretriculis, ut resciant, sintne gravidæ, nec ne, absque addito ullo alio signo. Ex quo ipso aliquoties, non ex urinâ, deprehendim⁹ & dixim⁹, id ipsas velle scire. Valent eadem h.l. jam dicta. Ideoque addere id etiam non erit de nihilo, quomodo judicandum seu divinandum, juxta vulgi mentem, non additis aliis morbi circumstantiis, sit ex urinâ? Præter, jam dicta notandum est 1. optimè omnium Medicum interrogando procedere, non quidem, quasi nesciat, sed ut certius sciat, quam decidendo. 1. Quærat cujus sit urina? an viri vel fœminæ? inde enim ansam habebit, ulterius quærere, 2. an decumbat; inde levitatem vel gravitatem morbi cognoscet; 3. quot annos habeat? inde enim ab ætate etiam argumentum capiet; 4. quamdiu jam decumbat? inde enim an acutus, an chronicus resciscet; 5. si id, quale fuerit morbi initium, an horruerit? &c. 6. si fœminæ sit, an & quomodo menses succedant? &c. sic enim uno narrato signo, facile plura colligi & edici queunt.

Quid verò in genere, juxta *Hipp. l.c.l. de arte*, tum quæ ægri jam perpetiantur, tum quæ perpeti possint, ex urinâ prædici possit, si quæratur, R. de aliis proximius, de aliis remotius. Proximi⁹ 1. vitia sanguinis, i. e. ebullitionem, cruditates admixtas, seri excessum &c. 2. Inprimis ventriculi, jecoris, renum & vesicæ morbi possunt patefieri, copiam vel defectum biliosi humoris, coctionis vitia, colationis & meatuum morbos. De reliquis verò qui ab his sunt alieni morbi, remotius.

Hinc e.g. si color remissior, & liquor pallidior, norat cruditates, tensionem ventriculi, præsertim à pastu, ructus, gravitatem capitis, inappetentiam, dyspepsiam, tensionem hypochondriorum, lassitudinem, somnolentiam, prægressa vitia diætæ in potu, respirationem difficilem, & si diu duravit, periculum cachexiæ, hydropis; si tinctior, an horruerit, quærato, hinc enim de calore, de siti, dolore capitis, vigiliis dici potest. Quærendum etiam an doleat latus, an sanguinem exspuat ratione pleuritidis, an urina pauca sit videat, & an tormina adsint, in dysenteriâ &c. vid. *Castro & Martin.*

*Tantum.*

Suspicit



**S**uspicit urinam medicus, præfagia vulgus  
inde velut certo lumine facta capit.  
Suspicit ut vultum, conjunctis omina signis  
format, & haut temerè quælibet eloquitur.

Scilicet est mutum signum, qui degener undis  
sanguinis exstillat liquor, honore minus.

Tu promus condus naturæ examina sistis,  
quæ sint, quæ possint rite tenere locum.

*Pereximio Dn. Respondenti, Auditori meo assiduo,  
docto, modesto, gratulor*

PRÆSES.

**U**T semeioticâ discis conamina diræ  
Noxia Morbonæ, frater amande, tuâ,  
Sic mihi commonstrat tua dissertatio docta,  
Quâ Duce sub forti, pulpita vestra sonant,  
Acri quo studio Phœbeia castra sequaris,  
Grataque quàm tibi sit gloria Latoidis,  
Quâ cinctus pellas posthinc mala corpore fata,  
Urinæ fluitent neve cruentiferae,  
Atque *Ἀσθῆνις* fugiatque *δυσσεία* vexans,  
Humorem salubrem fibra duplexque trahat.  
Euge bonum factum! Medicinæ culta Salanæ  
Agmina sectari mens studiosa jubet;  
Scilicet ingenuum nescit caligine mergi  
Pectus, & obscuro deliquisse loco,  
Expetit ast dignos virtutum & quærit honores,  
Quos etiam tradet Magnus Apollo tibi.  
Julia quas primò, quas lectio deinde Salana  
Concessere artes Tu modò porrò colas,  
**MAGNUM & WEDELIUM**, sub quo tutissimus ibis,  
Sedulus obseques, præmia, crede, feres.

*Id disputanti suo fratri gratulabundus ex animo precatur*

*M. Ernestus Ludolphus Schrader.*

*Acer*



*A*Cer & in stadio cursurus Apollinis ipse  
Fortius is, virtus cum subit alta PATRIS.  
Ille animas, sed Tu mortalia corpora curas,  
Totus ut ambobus demereatur homo.

*Q*uamvis nobilius videaris cedere PATRI,  
Ex sequiore tamen nobilis ipseus eris.

Nobil. & Eruditissimo Dn. SCHRADERO

συνοίῳ & Amico svavissimo f.

M. Jo. Georg. Müllerus Jenens.

---

*G*Rande Schraderiadum decus est, & nescius amplæ  
Nemo mensuræ Nominis esse potest.

*O*PTIME, participas nomenque & sangvinem & ausus  
Tantum, an dubites participare decus?

*Amicissimâ manuque & mente  
scribebam,*

M. Jo. Jac. Müllerus Jenens.

---

*F*Oetida, quæso, tuum calamum quid lotia ducunt  
Mi Schraderere? Novi quid speras inde lucelli?  
Forfan, quod quondam vectigal grande ferebat,  
id quoque nunc fidis lumen laudesque daturum?  
Rectè equidem: certè spe non lactaris inani.  
Sit licet urinis præsens tua charta referta;  
attamen insignis doctrinæ gratia juncta est.

*Ita Doctissimi sui Contubernalis præclaros  
dilaudare conatus decebat*

Gottlieb Profium, Soranum.

*F I N I S.*